



11. september 2013

Inatsisartut Suleriaasianni § 37 naapertorlugu Naalakkersuisunut apeqputit imaattut matumuuna saqqummiuppakka:

**Kommunimut tapiissutit nutaamik agguanneqarnerat pillugu Naalakkersuisunut apeqputit:**

**1. Suna pissutaava 2009-mi kommuninut tapiissutit agguanneqartarnerat pillugu isumaqatigiisummik Naalakkersuisut ataqqinnikkumanginnerannut?**

**2. Qanoq ilillutik Naalakkersuisut inerniliuppaat, Kommuneqarfik Sermersuumut tapiissutit 20 millioner koruuneqqissaanik ilanngarneqassasut tunniullugillu Qaasuitsup Kommunianut (12 millioner) aamma Kommune Kujallermut (8 millioner)? Akissummi Naalakkersuisunut ilannguteqquneqarput kommuninut ataasiakkaanut kisitsisit pingaarnerit tamannalu aqutigalugu tunngavilersorlugu, qanoq iliorluni kisitsisit pineqartut nassaarineqarsimanersut.**

**3. Tapiissutit nutaamik agguanneqarnissaannut Naalakkersuisut aalajangermata, kommunit amerlanerusunik aningaasanik perusuttut tamarmik parti Siumumik siuttuuffigineqarnerat qanoq pingaaruteqartigisimavara?**

(Inatsisartunut ilaasortaq Palle Christiansen, Demokraatit)

### **Tunngavilersuut**

Kommuneqarfik Sermersooq milliunerpasuarnik kommuninut allanut agguassinermut atatillugu akiliisareerpoq. Borgmester Aasi Chemnitz narup KNR-mut oqarpoq aningaasat 100 millioner koruunit misaanni amerlaasusillit pineqartut.

Nunami kommunit sinneri pingasut, tamarmik ilisarnaateqartut Siumukkormiunik aqunneqartutut kissaatigaat Kommuneqarfik Sermersooq sulii amerlanerusunik akiliisariaqartoq. Tamanna demokratiskiusumik isumaqatigiinniutigineqareerpoq, isumaqatigiittoqarsinnaasimangilarli.

Tamatuma kinguneranik Siumup borgmesteriutitai nakeriallapput kammalaatitillu Naalakkersuisuni ornillugit oqaluttuukkiartorlugit ajornartorsiorminnik. Ajoraluartumik Siumumi imaappoq iliuuseqartoqartariaqartoq Siumumut pitsaanerpaaq anguniarlugu. Allat – inuiaqatigiit sinneri ilanngullugit – kingulliussapput.

Taamaattumik imatut tupannartorsuunngilaq Naalakkersuisut iliuuseqarmata borgmesterit Siumukkormiut kissaataat naapertoqqinnaarlugu.



DEMOKRAATIT  
DEMOKRATERNE

Kommunit Siumumit aqunneqartut sooq aningaasanik amerlanerusunik tassanngaannaq perusulersimanersut pillugu tunngavilersuutit eqqortut, paasinartut naatsorsorluakkallu Demokratini pissanngatigineruagut.

Apeqqudit akeqquneqarput tigusineraniit ullut sulliviit nalinnaasut qulit qaangiutsinnagit.